

UDHËZIM
Nr.5, datë 26.11.2010

**PËR KRITERET DHE PROCEDURAT PËR PAJISJEN ME LEJE TË THJESHTË
MJEDISORE TË VEPRIMTARIVE QË LËSHOJNË ZHURMA NË MJEDIS**

Në mbështetje të nenit 102 të Kushtetutës dhe në zbatim të nenit 12 të ligjit nr.9774, datë 12.7.2007 “Për vlerësimin dhe administrimin e zhurmës në mjedis”,

UDHËZOJ:

1. Me qëllim shmangien, minimizimin dhe kontrollin e efekteve të dëmshme të zhurmës në qetësinë publike dhe mjedis, veprimtaritë ekonomike që lëshojnë zhurmë do t'i nënshtrohen pajisjes me leje të thjeshtë mjedisore (të tipit III 1/A, sipas përcaktimeve në vendimin e Këshillit të Ministrave nr.538, datë 26.5.2009 “Për licencat dhe lejet që trajtohen nga/apo nëpërmjet Qendrës Kombëtare të Licencimit (QKL)”) në përputhje me kërkesat e këtij udhëzimi.

2. Veprimtaritë që lëshojnë zhurmë në mjedis dhe që duhet t'i nënshtrohen zbatimit të këtij udhëzimi listohen në shtojcën I bashkëlidhur.

3. Për pajisjen me leje të thjeshtë mjedisore (autorizim mjedisor), subjekti fizik apo juridik që kërkon të ushtrojë veprimtarinë paraqet pranë QKL-së këto dokumente:

a) Ekstraktin e regjistrimit të subjektit pranë QKR-së;

b) Përshkrimin e objektit ku do të ushtrohet veprimtaria shoqëruar me adresën, planvendosjen dhe fotografi;

c) Projektin teknik ku të jepet informacion për llojin e veprimtarisë që synon të zhvillojë shoqëruar me planimetrinë e objektit ku do të ushtrohet veprimtaria, të dhëna për burimet e zhurmës si pajisjet/aparaturat e instaluara që lëshojnë zhurmë, si dhe vlerën teknologjike përkatëse të lëshimit të zhurmës, distancën me objektet e tjera dhe pozicionimin e tyre në raport me vendndodhjen e veprimtarisë dhe informacion për kohëzgjatjen e orarit e punës që kërkohet të zbatohet;

d) Raport për nivelet e pritshme të zhurmës që do të çlirohen në mjedis nga veprimtaria (matja të bëhet në kapacitet të plotë të teknologjisë së instaluar që çliron zhurmë), hartuar nga Instituti i Shëndetit Publik;

e) Faturën e tarifës së shërbimit prej 10 000 lekësh që paguhet për llogari të Ministrisë së Mjedisit, Pyjeve dhe Administrimit të Ujërave në Raiffeisen Bank;

f) Mendimin e njësisë së qeverisjes vendore ku të shprehet opinioni për zhvillimin e veprimtarisë;

g) Një procesverbal ku të tregohet që janë konsultuar dhe është marrë mendimi i banorëve pranë vendit ku do të zhvillohet veprimtaria;

h) Një deklaratë të subjektit që do të respektojë oraret e qetësisë publike dhe të lejes së thjeshtë mjedisore.

4. Drejtoria e Mbrojtjes së Mjedisit brenda 2 ditëve pas marrjes së dokumentacionit të aplikimit nga QKL-ja e përcjell atë elektronikisht për shqyrtim pranë Agjencisë Rajonale të Mjedisit (ARM) në qarkun përkatës.

5. ARM-ja brenda 3 ditëve nga marrja e informacionit bën verifikimin e objektit dhe në përfundim harton një relacion për rezultatet e verifikimit.

6. Në përfundim të shqyrtimit ARM-ja vendos:

a) Miratimin e lejes së thjeshtë mjedisore duke i detajuar në të edhe kushtet për mbrojtjen e mjedisit nga zhurmat në përputhje me formatin e Shtojcës II;

b) Refuzimin e kërkesës duke dhënë arsyet për këtë vendim;

7. ARM-ja miraton me leje të thjeshtë mjedisore (autorizim mjedisor) vetëm veprimtaritë që sigurojnë zbatimin e normave të lejuara të zhurmës në mjedis dhe garantojnë qetësinë publike

në përputhje me aktet ligjore përkatëse.

8. ARM-ja brenda 5 ditëve nga dita e marrjes së vendimit, sipas pikës 6, përcjell pranë Drejtorisë së Mbrojtjes së Mjedisit aktin e miratimit/refuzimit, e cila e dërgon menjëherë pranë QKL-së.

9. ARM-ja brenda 5 ditëve nga data e marrjes së vendimit informon me shkrim njësinë e qeverisjes vendore (NJQV) ku do të ushtrohet veprimtaria, duke i bërë të ditur vendimin e marrë, si dhe kushtet që duhet të zbatohë subjekti për mbrojtjen e mjedisit dhe qetësisë publike nga zhurmat.

10. Afati kohor brenda të cilit ARM-ja bën shqyrtimin dhe merr vendim për kërkesën është 8 ditë nga data e marrjes së dokumenteve të aplikimit.

11. Në rast se ARM-të kanë nevojë për asistencë teknike (për zhurmat) konsultohen me Agjencinë e Mjedisit dhe Pyjeve, e cila angazhohet dhe jep kontributin e saj pa vonesë.

12. Për zbatimin e këtij udhëzimi ngarkohet Drejtoria e Mbrojtjes së Mjedisit, agjencitë rajonale të mjedisit në qarqe dhe Inspektorati i Mjedisit.

Ky udhëzim hyn në fuqi pas botimit në Fletoren Zyrtare.

MINISTRI I MJEDISIT, PYJEVE DHE
ADMINISTRIMIT TË UJËRAVE
Fatmir Mediu

SHTOJCA I LISTA E VEPRIMTARIVE

1. Lokalet e natës/veprimtaritë e specializuara të argëtimit që gjenden në zonat e banuara ose çlirojnë zhurmë që ndikojnë në qendrat e banuara.

2. Furrat e prodhimit të bukës që gjenden në zonat e banuara ose çlirojnë zhurmë që ndikojnë në mjediset e banuara.

3. Serviset e automjeteve, gomisteritë dhe pikat e larjes së automjeteve që gjenden në zonat e banuara ose çlirojnë zhurmë që ndikojnë në qendrat e banuara.

4. Punishtet/veprimtaritë e saldimit të metaleve që gjenden në zonat e banuara ose çlirojnë zhurmë që ndikojnë në mjediset e banuara.

5. Veprimtaritë e prodhimit/përpunimit të duraluminit që gjenden në zonat e banuara ose çlirojnë zhurmë që ndikojnë në mjediset e banuara.

6. Veprimtaritë e përpunimit të mermerit dhe gurëve dekorativë që gjenden në zonat e banuara ose çlirojnë zhurmë që ndikojnë në mjediset e banuara.

7. Veprimtaritë e prodhimit të mobilieve në zonat urbane/në brendësi të qendrave të banuara.

8. Veprimtaritë që për shkak të natyrës së tyre përdorin vazhdimisht gjeneratorë/ventilatorë, të cilët lëshojnë zhurmë në mjediset e hapura të zonave të banuara.

9. Nyjat e fraksionimit të mineraleve, në rast se gjenden brenda zonave të banuara ose çlirojnë zhurma që ndikojnë në zonat e banuara.

10. Prodhimi i betonit, llaçit, kollës, gëlqeres (parafabrikateve, blloqeve, paletave etj.), në rast se gjenden brenda zonave të banuara ose çlirojnë zhurma që ndikojnë në zonat e banuara.

11. Punishtet e pijeve alkoolike, produkteve shtazore dhe bimore, në rast se gjenden brenda zonave të banuara ose çlirojnë zhurma që ndikojnë në zonat e banuara.

SHTOJCA II FORMATI I AUTORIZIMIT MJEDISOR (leje e thjeshtë mjedisore)

--



REPUBLIKA E SHQIPËRISË
MINISTRIA E MJEDISIT, PYJEVE DHE ADMINISTRIMIT TË UJËRAVE
Agjencia Rajonale e Mjedisit e Qarkut _____
Adresatel.....

Nr. Prot.

Data200.....

Nr. Identifikues ____

Nr. i vendimit _____

AKTMIRATIMI
AUTORIZIM MJEDISOR
Për veprimtari që lëshojnë zhurmë në mjedis

Në mbështetje të ligjit nr.8934, datë 5.9.2002 “Për mbrojtjen e mjedisit”, të ndryshuar dhe në zbatim të nenit 12 të ligjit nr.9774, datë 12.7.2007 “Për vlerësimin dhe administrimin e zhurmës në mjedis miratohet autorizimi mjedisor:

Veprimtarisë:

Subjektit:

Vendndodhja:.....

Veprimtaria do të zhvillohet me këto kushte dhe kërkesa:

1. lista dhe lloji i pajisjeve që lëshojnë zhurmë;
2. oraret dhe lejuara të çlirimit të zhurmës;
3. masat për kufizimin e zhurmës, mbrojtjen e mjedisit dhe qetësisë publike nga zhurmat;
4. kërkesat për vetmonitorimin/matjet e zhurmës (periodike) dhe raportimi i të dhënave;
5. kërkesën për afishimin e orareve të punës për të cilët miratohet leja e thjeshtë mjedisore;
6. sanksionet e mundshme në rast të mosrespektimit të kushteve të lejes së thjeshtë mjedisore;
7. tarifa e autorizimit mjedisor.

Nënshkrimi
